

SECHABA SA HESO,

KE HOA MALUME HO LONA BASOTHO BA HESO NAKONG  
ENA EO RE KETEKELANG MAFELO A SELEMO LE HO  
AMOHELA SELEMO SE SECHA.

SELEMO SA LIKETE TSE PELI LE MASHOME A MABELI (2020)  
E BILE SELEMO SE BOIMA KA MOKHOA O KHETHEHILENG.  
KE SELEMONG SENA LEFATS'E LE ILENG LA HLASELOA KE  
LEFU LA MOHLOLO LE BITSOANG COVID-19.

KA LEBAKA LA SEKHAHLA SEO LEFU LENA LE ILENG LA  
KEKELA KA HARE HO LINAHA TSA LEFATS'E KATENG,  
MOKHATLO OA MACHABA OA LITABA TSA BOPHELO (W.H.O)  
O ILE OA TLAMEHA HO PHATLALATSA LEFU LENA E LE  
SEOA.

BOHALE BA LEFU LENA HA BO EA KA BA POTA BASOTHO LE  
LESOTHO KA THOKO.

RE ILE RA BONA HA KAROLO E 'NGOE EA SECHABA E  
TS'OAETSOA KE LEFU LENA.

BA BANGATA BA ILE BA HLAPOHELOA, EMPA, KA MASOABI  
A MAHOLO, BA BANG BA ILE BA TIMELA KA LEBAKA LA HO  
IMELOA KE LEFU LENA LA COVID-19.

KA ONA MOTSOTSO, KE KOPA RE HOPOLENG KA HLOMPHO  
BARATUOA BAO BA RONA BA SENG BA FALLETSE  
LEFATS'ENG LE KA KOANO.

RE HOPOLENG LE BOHLE BAO MORENA MOLIMO A BA  
BILELITSENG HO EENA SELEMONG SENA SA 2020 KA  
LITSELA TSE FAPANENG.

RE BA KOPELE PHOMOLO E SA FELENG MOHAUNG OA  
MOLIMO; RE NTSE RE SA LEBALE HO KOPELA MALAPA A BO  
BONA MATS'ELISO A 'NETE A TSOANG HO 'MOPI OA RONA  
BOHLE.

KE SELEMONG SONA SENA SA 2020 MOO RE BONENG HA  
LEFATS'E KA BOPHARA, LE KOANO HAE, HO EMISOA

METSAMAO EA SECHABA, HO KOALOA MESEBETSI, LE LIKHOEBO KA KAKARETSO.  
LIKETSAHALO TSENA LI NONYELITSE MORUO OA LINAHA KA MOKHOA O MOHOLO, HAHOLOHOLO, MORUO OA LINAHA TSE HOLANG JOALO KA LESOTHO.  
RE BONE HORE HO NONYETSEHA HONA HOA MORUO HO TLISELITSE MAHLOMOLA A TLALA LE LEQEME LE LEHOLO LA MOSEBETSI, HAHOLO HO BACHA BA RONA.

LEHA RE NTSE RE TSAMAEA HAR'A BOIMA BO BOKAALO, RE NTSE RE TS'OANETSE HO LEBOHA MORENA MOLIMO KA MOHAU OO A RE SITSITSENG KA OONA.  
SETSOKOTSANE SA SEOA SA COVID-19 SE FIHLILE NAHENG EA RONA KA MOKHOA O KEKENG OA LEKANGO A LE OA LINAHA TSE LING.  
HA RE LEBOHA MOLIMO KA MOHAU LE MOSA OA HAE KE LE MEMA HORE RE SEBELISENG MANTSOE A MOPESELEME A RENG: "KE TLA BUSETSANG HO JEHOVA, MELEMO EOHLE EA HAE E LUTSE HO NNA" PESALEME 116: 12.

BASOTHO BA HESO,

HARA TSE NGATA TSEO SEOA SENA SE RE RUTILENG TSONA KE HORE RE TLAMEHA HO SEBELETSI HO IPHEPA RE LE SECHABA SA BASOTHO. HA HO LE THATA, LINAHA LI QALA PELE KA HO SHEBA LICHABA TSA TSONA PELE LI KA THUSA LICHABA TSE LING.

KA HONA, RE HLOKA HO NTLAFATSA MEKHOA EA RONA EA TEMO LE HA RE SE RE PHELA TLAS'A MAEMO ANA A BOIMA A PHETOHO EA LEHOLIMO.  
NAKO E FIHLILE JOALE EA HO NKA TEMO - E KABA EA LIJALO KAPA EA LIPHOOFOLO - E LE LEFAPHA LE LENG LA BOHLOKOA LE KA THUSANG HO HOLISA MORUO LE HO HLAHISA MESEBETSI.

BO MME LE BO NTATE,

LE TLA HOPOLA HORE SEOA SENA SA COVID-19 SE FIHLILE RE NTSE RE LOANA LE KHOLUMO-LUMO EA HIV/AIDS. KE LILEMO TSE FETANG MASHOME A MARARO JOALE RE NTSE RE LEKA MAOALA OHLE HO BONA HORE RE HLOLA LEFU LENA LE QETANG SECHABA. KA HONA, RE ILE RA THABA LE HO KHOTHALA HAHOLO HA TLALEHO EA SEPHETHO SA LIPHUPUTSO TSA LEPHIA, E ILENG EA PHATLATSOA KE MOTLOTLEHI 'ME 'MASENATE KA LA 30 PULUNGOANA, E BONTS'A HORE NAHA EA RONA E FIHLETSE LIPEHELO TSE BEILOENG KE MEKHATLO EA MACHABA HO RE THUSA HO HLOLA LEFU LA AIDS. LE HA RE KHOTHETSE HA KAALO, RE NTSE RE TS'OANELA HO EMA KA MAOTO HO BONA HORE SEKHAHLA SA LITS'OAETSO TSE NCHA SEA THEOHA. RE TLAMEHA HO HOPOLA KA MEHLA HORE HO, LOANTS'A LEFU LENA LA AIDS KE BOIKARABELLO BA MOSOTHO E MONG LE E MONG - E MOHOLO LE E MONYAME. ETSOE BASOTHO BA RE "LEHLANYA LEA BOKANELOA".

BASOTHO BA HESO,

HA KE LE MOTHATING ONA, KE LAKATSA HO LE HOPOTSA HORE NAHA EA RONA E NTSE E TS'OARANE LE TS'EBETSO EA BOHLOKOAHALI EA HO HLAHLOBA LE HO HLOPHA BOCHA LITS'IEA TSA RONA TSA PUSO. JOALO KA HA LE TSEBA, MOSEBETSI ONA O ETELLETSOE PELE KE LEKHOTLA LA NAHA LA TLHOPHO-BOCHA (NATIONAL REFORMS AUTHORITY). KE TEBELLO EA RONA BOHLE HORE LEKHOTLA LENA LE SEBETSE 'MOHO KA KUTLOANO LE KA MOFUTHU, LE 'MUSO, SADC ESITA LE BAFANI, HO PHETHAHATSA KA POTLAKO, LE HO ATLEHISA MOSEBETSI ONA OA BOHLOKOAHALI. TS'EPO EA KA, LE EA SECHABA, KE HORE KATLEHO MOSEBETSING ONA OA TLHOPHO-BOCHA E TLA TLISETSA NAHA BOTSITSO LE KHOTSO; 'ME KHOTSO ENA E KA BA

MOTHEO OA HO MATLAFATSA LE HO HOLISA MORUO, RE TLE RE TSEBE HO HLOLA TLALA, TLHOBOLLO LE BOFUMA. KE KOPA HO NKA MONYETLA ONA HO LEBOHA, KA TSELA E KHETHEHILENG, BASOTHO BA BOITHATELO BO BOTLE, BA TSEBANG LE HO THAHASELLA NALANE EA SECHABA SA BASOTHO, BA ILENG BA RE HOPOTSA HORE LILEMONG TSE MAKHOLO A MABELI TSE FETILENG, KA SELEMO SA 1820, KE HA LEPOQO, MORA OA MOKHACHANE, A TSOA MOTSE HO TLOHA MENKHOANENG HO LEBA BOCHABELA SEHLABENG SA BOTHA-BOTHE, MOO A ILENG A THEHA MOTSE TENG. RE JOETSOA HORE KE HONA MOO MORENA MOSHOESHOE A ILENG A NKA MEHATO EA PELE EA HO THEHA SECHABA SA BASOTHO KA HO BOPA SETSOALLE LE MARENA A KANG MORENA LETHOLE OA MAKHOAKHOA, MORENA MAKARA OA BAFOKENG, LE BA BANG.

E LE HO TS'OAEA LE HO HOPOLA KETSAHALO ENA EA BOHLOKOA NALANENG EA BASOTHO, RE ILE RA NKA LEETO LA HO TLOHA MENKHOANENG HO EA BOTHA-BOTHE. RURI E BILE TLOTLA E KHOLO HO RONA HO TSAMAEA MEHLALENG EA BAHOLO BAO BA RONA. TS'EPO EA KA KE HORE, BANNA LE BASALI BA BASOTHO BA KA ATLEHANG, HA NAKO LE MABAKA LI BA LUMELLA, BA KA TSAMAEA LEETO LENA HO IKHOPOTSA METHEO EA RONA RE LE SECHABA SA BASOTHO - METHEO EA BONNGOE, KHOTSO, LE LERATO.

SECHABA SA HESO,

HA RE FIHLILE MAFELONG A SELEMO, JOALE RE LE MATHULENG A SE SECHA, HA RE KOPENG RAMASELI HO RE TATAISA LE HO ATLEHISA LITSELA TSA RONA. HA RE BEHENG TS'EPO EA RONA EOHLE HO EENA E LE HORE RE TLE RE TSAMASOE KE EENA JOALO KA HA MORENA SALOMONE A NGOTSE BUKENG EA BOHLALE A RE: "U TS'EPE JEHOVA KA PELO EA HAU EOHLE, U SE KE UA ITS'EPA HLALEFO EA HAO. U MO KENYE MERERONG EA HAU

EOHLE, 'ME O TLA U TSAMAISA LITSELENG TSOHLE TSA  
HAU". LIPROVERBIA 3: 5-6.  
KE QETELLA POLELO ENA, KA HO LE LAKALETSA MAFELO A  
SELEMO A TLETSENG KHOTSO, KATLEHO LE  
MAHLOHONOLO.  
HA RE IPEHENG HO MORENA MOLIMO KA LINAKO TSOHLE  
HORE A TSOELEPELE HO RE FA BOPHELO BO BOTLE  
MMOHO LE MALAPA A RONA.  
E SE EKA SELEMO SE SECHA SA LIKETE TSE PELI,  
MASHOME A MABELI A MOTSO O MONG (2021) E KA BA  
SELEMO SE RE TLISETSANG TSE MOLEMO KA HARE HO  
MALAPA A RONA, LE KA HARE HO NAHA ENA EA RONA EO  
RE E RATANG.

MOLIMO O BOLOKE LESOTHO LE BASOTHO.

KHOTSO! PULA! NALA!!

.  
. .  
. .  
. .  
. .